



09972

祁忠惠公遺集卷一

明祁彪佳著

賞罰激勸疏 崇禎五年五月

涇縣潘錫恩校

四庫全書

卷一百一十五

國家賞罰之典爲帝王勵世磨鈍之權是故賞一人而天下勸以賞之茂其功也考當日遵永之難僅復空城猶且冒廕冒陞不可指數獨黔功因一級之疑遂稽三年之敘及勘報旣眞而彤弓下錫又皆督撫總帥帷幄大臣其陷敵衝鋒之將士曾不與焉殊失投醪挾纊之仁矣况今青萊用兵士氣全賴鼓舞似宜特頒賞格預儲金錢使躬親戰陣之人必立膺椎享之惠夫然後敵愾之氣奮而迅掃無難乃若世廕之典必以待非常之功否則寧優加金帛勿以世祿糜大官是又賞之不可不慎者也罰一人而天下懼以罰之蔽其罪也邇來秦中流寇縱橫州縣已無逃失地之律卽

乾坤正氣集

卷四臣王

一

昨秋東省逃兵猖獗有司亦盡蒙禰斥之加何以孔逆連破六邑遂無議處一官則是效死之大義不必明朝廷之簡書不足畏所以登黃被陷滿城煨燼竟莫敢一問者似宜核任之淺深地之難易失事之輕重大小分別嚴處其殉難如新城秦令者量加卹錄夫然後無逃之誼彰而人心始固乃若隱匿之條載在令甲今奴掠者疊告參奏者幾何疎玩之責固難辭欺蒙之習尤當破又罰之不可不飭者也至巡按御史必身立功罪之外方可稽核功罪巡視科道必身異監督之司始能覺察監督若置巡按於功罪中令巡視與監督等則冒濫扶同之弊亦未必其有補矣

旨科道官原以摘奸剔弊爲本况奉命差豈得委身事外若通同朦狗責有攸歸川功及東省失事州縣著速查奏奪

定一時勝略疏 崇禎五年六月

臣惟軍旅思險隱情以虞兵機之不可輕洩固也曷曰幾事不密則害成臣恭繹聖諭申飭科臣有曰事關軍情猶然茫視遲慢漏洩爲誤不小仰見我皇上神謀淵慮超越千古蓋有見於不密之爲害也然聖諭又不嘗以某本不妨抄傳某本不應抄傳令科臣看詳乎臣愚以爲不應抄傳者幾先之秘臨事之謀制勝出奇呼吸萬變者是不妨抄傳者強弱之分順逆之勢去來之狀勝負之常疆場情形一彼一此者是且以言乎塘報則將士上之督撫督撫上之皇上敵國之人尙能得諸偵探豈輦轂之下不宜公之睹聞以言乎章奏則皇上下之該部該部下之督撫疆圉之外尙必見諸施行豈闕廷之前不許共相昭揭今各科臣惟漏洩之是虞致緘藏之過密略涉軍務槩禁抄傳卽偶有之又於小勝則彰大潰則掩令人買賣昏昏然既是任耳都屬傳疑臣於是亟抱杞人乾坤正氣集

卷四十一

二

之慮矣當此四郊多壘人切同仇自抄傳禁而情同射覆隔若面墻欲借箸而苦曲折之未諳欲請纓而憚遙揣之未真卽樞筦堂司果足以了天下之事而使大小臣工於邊計軍書皆有似無疑非疑是於胸中則揣摩觀望之念多而奮迅協和之象寡憶去秋大凌之築敗隙先開乃以倉卒成謀無從昌言阻執究之資糧士馬盡委圍中益以叛將逃兵流毒無己先事乏萬全之防致臨敵貽決裂之禍此蓋其一徵也然臣所慮不止此也邇來盜賊縱橫人喜語亂自抄傳禁而訛言四起紛呶百端賊未來也而誤以爲來兵未敗也而誤以爲敗流徒緣之載道草澤亦且生心鶴唳風聲徒張賊勢狐疑狼顧自墮軍容甚且彼已情狀有臣下不知道路反悉者好莠自口夫誰禁之憶己已敵震都城臣鄉兩旬耶報不通謠傳日四五至蓋繇制勝之略未能曉暢於天下因而潰

逃之病反以中人於膏肓此又其一微也然臣所慮又不止此也大凡封疆任重欺蔽易生自抄傳禁而專闕之馳奏俱不得揚言於在廷言路之糾彈遂不敢憑臆於局外敗形勝著總屬渺茫我策賊情隨其裝點倘有鄙臣猾帥或掩敗以爲功或飾小以爲大該與逆折其萌芽直發其隱覆乎自今晉撫屢上首功忽而賊踰十萬汾平之交所在充斥輝濟之界亦切震鄰使當時早爲參駁亦何至玩寇若斯地方之失事莫問邊臣之罪案奚明此又其一微也要之聖諭自明而奉行未免太過伏乞敕下該科申明不妨抄傳之旨忠益以收羣疑以戢壅蔽之漸亦以杜矣然臣又不能無請於密封之本焉皇上聖神文武折衝不出樽俎之間非臣下所可測識萬一乃臣伏讀高皇帝有酬應天下兼聽廣詢之諭再觀先臣劉大夏有揭帖密進不若與衆共之之言在皇上獨持魁

乾坤正氣集

卷四百十一

三

柄更祈廣運無方且如議勦議撫言戰言守出之於臣下不過爲敷陳而必勦必撫定戰定守採之於宸衷始成爲廟算若既定之廟算固宜密斷於淵深而方上之敷陳不妨廣收其參酌伏乞皇上於諸凡塘報奏章苟非密切機宜外廷必不可預聞者沛發明旨照常科抄自是詔令炳於日星而赫聲濯靈震疊徧照臨之下矣然臣又不能無望於召對之典焉當皇上立極之初首御平臺商榷機務聖謨洋洋垂法萬禩今鉅典間舉止及三四輔樞諸臣臣伏覩成祖召胡廣等諭諸將進言而虜穴以掃孝宗召劉健等訪兵部將材而夷氛以靖此皇上已行之盛典更祈率由無疆况東西多事之時正獻替靡遑之日乞皇上遇大政大幾徧召九卿令之從容陳說有若古之更日宿直以次轉對再復記注令之所見必書有若古之右史記言左史託動并及科道令之因事糾正

有若古之中書議事諫官隨之自是交泰洽於天地耆定在指顧之頃上以廣明目達聰之用下以開奔奏禦侮之忠而底天下於蕩平正直之路矣

旨言官留心兵計自可據憫陳謀豈必盡藉邸報况前諭兵科詳審本章原非概祕示疑今後除密切事情外可照常發鈔以信前旨至召對朕自酌行毋庸陳請也

備察羣情疏

崇禎五年十月

臣惟帝王乘乾膺籙凡大臣小臣文臣武臣外臣內臣皆使之各安其位而後有以各盡其心使之有不相借之事權而後有可獨責之成績若越俎而問庖便曠官而怠事若瞻顧於官守之外便虧缺於官守之中臣竊慮之敢畢其說臣聞書稱克艱詩著靖其蓋匡弼實在大臣而曰敬曰禮則信任屬乎君父邇來大僚諸席

乾坤正氣集

卷四十一

四

或令再推或點陪推在皇上原出慎重用人之意在臣下不無未蒙見信之疑至於六卿九列之長詰責時聞引罷日見因而覺有急遽周章救過不遑景象卽不謂盡蒙飾以解罪亦未免欲脫卸以潔身近日原任憲臣陳于廷以四朝遺老旦被嚴譴疲驢破帽夕出國門矣雖進退予奪盡見天心惟是稍於國體有傷不無人情微鬱且竊恐當事諸臣皆怵於嚴旨冀以迎合揣摩善保名位則未得其振勵之效反滋爲悠忽之圖臣所慮於大臣者此也諸司百執事皆皇上所薪槓進之令其奔走禦侮者也乃諸臣過誤相仍自武闡數案以來或沈孤影於山林或泣寒風於狴狴漸至人多畏事不知厚祿之爲榮念本避難反借高名以徼去此世風之極弊士氣之堪憂者夫人材有限中下半參非藉皇上感發其忠義何以鼓舞於功名今有一二考之方伯尙滯跡於外藩十餘

載之臺員竟懷憂於維谷甚則餉司輪遣差規欲改夫三年劇郡
久虛曹郎竟難於一轉而司道有司又或以欽件之波累由人錢
糧之轉解未到降級住俸十居二三臣子精神才具必其稍有餘
地而後可以展布發舒若復迫於功令必至苟且支吾急功赴名
之心不勝其掩罪匿瑕之念矣且也自便之私固宜去止足之義
亦宜明今一番陳請一番諭留究之請者若無解於託詞留之亦
將仍爲格例遂有眞苦眞病不得省子舍而正首邱者矣臣所慮
於羣臣者此也我國家武功造邦高出于古然當時如徐中山輩
皆讀書守禮有儒者之風而諸凡跡跡不羈之士則必謹其銜勒
而後使詐使貪皆得其一臂之用皇上間輦而思將帥之臣寤寐
求賢同符二祖倘得眞正英雄卽推轂設壇夫豈爲過但甞麟負
俗決不肯俛仰司馬之門若必依序循資則雖冒濫之竇可清似
乾坤正氣集

亦獎拔之術未盡至於軍國所關莫漕運爲大目前舊漕旣竣新
運方行而流賊漸入中州蠢動更憂曹濮一綫輸輓阻塞可虞諸
凡回空之償催水次之兌發過淮過濟之限單事屬官旗全須催
督若一幫之遲誤一程之稽延必待參題奏聞始能挽遲爲速則
恐曠日旣多悞事不小臣所慮於武臣者此也皇上深懲惰窳特
遣內臣然必搜剔出於不意姦弊乃可無遺若撫按之事多令監
視會同則恐同罪同功反使互蒙互蔽開水火之端其患顯啟交
結之漸其患深卽如敘功保能薦及督撫藩臬事雖爲公迹亦當
避近日京營操練復遣七人夫虎旅赴桓皇上誠以重干城之寄
但驟列多員參分闔令竊恐外間諸弁自好者不免因之以卸責
不肖者遂至借此以趨承蓋當人心警惕之初正不妨於立異第
恐情面習熟之後馴且至於和同臣所慮於內臣者此也伏乞皇

上俯鑒臣愚特賜採納寬之以任使之途皆俾其竭忠於職業嚴之於等制之辨正所以鼓勵夫臣工自將羣策畢集謨烈無疆外攘內安治隆堯舜矣

旨臣子誼在靖其若比狗欺蒙豈容不重懲一二今各官不思改圖仍然玩泄規卸科道卽應指實參糾至漕運事宜及特遣內臣屢旨甚明何得任意賣陳姑不究

合籌天下全局疏

崇禎五年十一月

竊惟天下亦脊脊多事矣臣以爲不足憂也有外懼方有內寧但今日有一番蠢動便有一番張皇有一處震驚方有一處布置纔有事便言募兵乃兵募而餉則苦不繼纔用兵便請發餉乃餉發而兵復苦多譁不無矜捉肘露之形且有朝不及夕之慮夫亦合籌其全局而坐算於廟堂可乎臣所謂三大要者東插孔賊是也

乾坤正氣集

卷四十一

六

所謂四大勢者秦晉中州之流賊江右楚粵之山賊浙閩廣之海賊黔滇湖蜀之土司是也扼大要在離彼之交據大勢者在合我之力何以言之夫以東之強我不可以力制也思所以勦東者有用虜用插之二著而尤莫急於插蓋虜附東用之固爲東肘腋憂但恐東暱虜甚反借虜以窺我足慮也若東與插不兩立第慮我無所以懼插插之怯猶故耳欲懼插必豢卜什諸部使伺插插不得安套之巢穴則必且搖尾而乞憐於我我因激之且餌之使嚙東東必勢伏不敢動卽動而虎鬪漁人之利我可收也使套插二則插必洩忿於東使東插二我不特可得志於東兼可讐服於插夫宣大之賞卜虜所有也插奪焉東且垂涎焉而虜復不能不徘徊於去就焉示之以利衆將爭趨則上谷雲中其爲夷虜所窺伺往來也必矣乃邊牆之頽蕩如許士馬之饑溺如許欸不足恃

將言戰戰不勝乎是則宿重兵以沮不測當不在三協下也臣所以策東播者此其一自叛賊困於登城而孔渠之首亦人所欲因以爲利者也誠使我有以開之賊雖黠必內自疑內自疑必互攻殺兵法所謂多方以亂之非乎間有更端或貸其脅從而下之令能間者與戰勝同賞或得其僞將姓名故作內應之語使賊聞而猜忌起衆不得安或旦則緩攻夜則張火每每驚之或以偏裨用黃龍之書旗號陽與之通卒然入焉又或誘之出而四圍蹙之賊之亡也日可俟也否則堅城之下仰攻爲難露布之師宿飽非易不特賊爲虎岫卽鳥獸之散而東投島則恐歸敵西陸走則恐合寇南下則侵淮右北上則震天津憂難圖矣島帥黃龍初慷慨殺賊今或資其臂力不可得且與之餉不受臣則有以料龍矣夫龍能必島人之不從賊也不能必島人之截賊且攻賊龍不能違島

董坤正氣集

卷四百一十

七

衆心而遂不無倚賊爲重之念則遣一人以監其軍庶幾功收控扼令賊不得與朝夕相上下夫勝兵易驕老師易竭皇上念東征勞苦錫挾纊之特恩臣更念於水天凍地時設牛酒慰勞至於解萊復黃敘功宜蚤凡所以作其氣而衆心可成城也臣所以策孔賊者此其一今夫蹂秦躡晉飄忽於中州者非流賊也耶散黨殲渠之明旨秦始終遵之而以次翦滅矣然使去賊歸來之窮黎半菽不飽一枝莫棲展轉無聊必復去而爲盜耳計惟有所以安之安之或以蠲或以賑而尤在實之以土地歸之以屯堡聯之以保甲誠俾其樂利之心足以奪其赴死而兵可鋤劍可犢也目前賊去晉以晉尙有野掠且清化一搶飽其欲以去故暫復中山以護其子女玉帛耳太行之險凡泥可封則曠野平原孰禦其逞臣竊謂中州之賊不終去也今日標兵毛兵與夫左良玉新調之兵要

在統轄歸一合練之以成勝兵蓋當賊散走之後便須分應而窮其歸在賊竄伏之時必先合練而壯其勢若夫人自爲戰家自爲守又非鄉兵不可中州之民尙勇而好義以公鬪則強臣父先臣承燦之備兵河北也以十法鼓勵之迄得其用聞此番賊棄睥睨懷慶不得逞鄉兵預有力焉但使中州不必內自顧而以其餘力合三秦則晉賊乃可圖也今夫奔東突西盤據於地者非山賊也耶么麼小醜楚粵迫之則西流江右逐之則東去亦易與耳何以尙煩掃蕩也則窟穴之未靖也先臣王守仁平桶岡三建建平崇文諸邑斷賊之臍脇利賴於今今聞九連之爲山非盡絕壁天險地不毛而人獸處也蓋可耕可鑿可附職而衣冠之也誠擇其沃野立州縣險隘者創寨保因其曲折而井廬之以其稅租入縣官充兵餉括峒民隸版籍練爲兵是固所謂戍其地卽用其地之

乾坤正氣集

卷四十三

八

人也居其野卽食其野之粟也如此而再以楚粵江右遙壯聲援虔撫練臨卒三千人不革心殺無赦臣未見一隅終同化外也至於海則異是蒼波碧澗之中風帆瞬息之所稱爲老而雄黠自命者多奸民非第饑民也十年以來流毒於閩肆蠶於粵今且壑於臣鄉浙矣賊以舟爲穴以風潮之順逆爲往來必不敢舍舟而深入我堅壁持之一面遣驍卒焚其舟賊窮矣然內地之布置不可不密國初鎮巡衛所星羅棋布綦密矣而亦有以時爲因革者如臣向謂蒲陽蒲口湄州宜伏三江口宜守臣曾條列其便當事採焉卽一郡而沿海之銃臺宜築內港之地釘宜多海口之石墩宜立者不知其幾奈何不圖所以不可敗而小逞則大呼粵恃一鄭芝龍閩恃一鄭芝龍驅寇一芝龍也翦夷一芝龍也芝龍卽果忠義非跋扈亦豈樓船將軍遂無可以寄長城者乎夫紅夷能水鬪

不能陸戰卽其大船如山能遊移於外洋不能據沿內港無足深患所患者在內地奸人勾引之接濟之且禁勾引禁接濟不可與禁開洋同日語也因杜闌出之瓜酒并杜有票引之商船是因噎而廢食也乃若開洋又不可與探捕同日語也闔地窮民稠疊依海爲田八口之家終歲之衣食於漁焉資之漁一禁漁民有坐稿耳然海賊向止劫貨今并勒贖矣向止據人今并奪舟矣漁民受禍慘故積怒深其怒可充而出沒波濤之膽力更足用也則莫若以保甲之意行以部署之法而鍊之爲漁兵其法以十舟爲鯨立什長十鯨爲甲立百長因漁民之信服者爲之出海則絡繹而行遇賊則合鯨爲擊又有粵民之一議在其議每漁民二十人作二十一一人分漁利而以一人之漁利充兵糧每漁船二十枝作二十一枝分漁利而以一船之漁利造兵船以殷實者主之在城守防

置必如黔之撫安位者約之以四事招撫有實而後東南不厘聖明之顧也至於永順之事亦當處明決無鄰境土司可以哆口角力之理在此輩怒獸鬻人何足稱責惟是中朝制馭之體不可不明震疊之威不可不立况二酋又諸酋所觀望而歎服者也而聲援何可不得當也總之上兵攻心王者無敵蠢茲遍於疆域分其勢以勘定則難籌策逸乎天心握其機以消弭則易東插鷓蚌之勢成而犁掃有自孔賊遊魂之地窘而獻敵可期殺賊必先惠民善撫之而斬馘皆吾赤子原無取於今日報級明日報俘馭夷只在神武善馭之而鱗介亦可冠裳又奚得以氣盈言戰氣竭言撫此之謂伐謀此之謂戰勝其以救寧天下有餘矣乃臣更爲根本進籌則戢兵是也今天下蒼生苦盜而苦兵殆不減乎盜蓋不練之兵畏盜而不戢之兵且爲盜夫至民不苦盜而苦兵則盜日衆

乾坤正氣集

卷四十三

十

兵不爲兵而爲盜則兵日驕前者山右諸卒淫殺類於夷虜矣而今二東之所與我敵者固我所十年參養衣租食稅之兵也而何以至此極也則戢兵正強兵之本也臣請更爲銷兵之說而戢兵又其後者夫兵何可以銷也亦思所以用衛而已矣太祖高皇帝曰吾養天下兵不費民間斗粟惟是有一衛卽設一屯以屯畜軍而軍不患於乏食卽軍足食而民不患於養兵卽古所謂蒐狩之事寓之井伍軍旅之治屬之司徒行之萬世可無弊也自衛所虛而各兵日益增則土軍日益減兵衛日益冗則屯糧日益湮矣夫土著之軍不若兵之善逃且善譁也第恐不任戰耳然亦顧鼓勵之何如安見此中遂無超距而衛外之召募起卽驛驛隨之矣誠以京營之簡選壯者簡天下衛所以京營之練選壯者練天下衛所則練一衛軍可裁一募兵矣練一壯軍可汰一冗軍矣兵益簡

則餉日饒餉益饒則兵益強又何煩大司農之輸餉乎天下且日憂匱乏哉臣目擊時艱繆陳芻見伏乞皇上俯賜睿覽倘有一得可採裁擇施行

特糾南樞疏

崇禎五年十二月

南樞傅振商泄泄成習夢夢爲心當其撫虔也寇氛之醞釀已深任方離而賊遂發於一旦及其筦樞留部則情牽詩酒之場日以翰墨爲事雨花燕子恣彼登臨清客山人任其假借南京五十二衛凡僉官僉甲實多賣富差貧漕臣李待問不得已改屬刑廳振商輒盛怒以爭謾言相詆蓋曰明職掌也不移時而科臣郭建邦參武選郎陸時選壞運受財屈指可數振商則陽查陰庇及李待問具題改僉而奉旨嚴詰則振商果明職掌乎隳職掌乎至以八萬五千之額率僅存四萬直至主事陳鍾盛極口空虛始議勾補乾坤正氣集

卷四十一

十一

乃洩歲而復如故矣其他如厲商之侵尅未聞杜絕把總之收買未見飽騰衛軍之竄逃聽其出於規避衛弁之腹削未能一洗弊叢疎慵若此而其引病乞身之章反作誇績張功之語刺刺不已似有尤人之意臣恐覆餗之譏伐檀之誚振商必不能辭其咎矣乞亟賜鑒裁或責成以勵其榆收或罷歸以全其末路庶重地賴有藩宣臣工咸加儆勵矣

陳民問十四大苦疏

崇禎六年正月

一曰里甲之苦自一條鞭之法行差徭咸入正賦安得里甲用之也乃僻邑遐陬公然僉派歲節之餽送過客之供應新官之鋪設軍戶之起解事無難易槩令支當至於解銀一差尤稱重困發領之際吏緣爲奸兌收之時賠折無算更有發空批令墊納在先要補於後者河南按臣李曰宣行官收官解中州便之何不可行之

天下也一曰虛糧之苦易知則例小民多未見聞第據縣符便爲實數遂致貧戶反溢數倍豪家坐享餘租此飛灑之弊也近來苦盜苦荒遷徙載道丁糧缺徵里甲代償富戶化而爲貧土著化而爲客此逃亡之弊也又有戶產盡廢戶糧猶存買產之家視若隔體代納之戶慘於剝膚此賠墊之弊也一曰行戶之苦小民以刀錘博什一爲八口計也有司僉爲鋪行上自印官下及佐貳硃票一紙百物咸輸累月經年十不償一又有供應上司名曰借辦每物有行每行有簿此苦臣鄉實甚曾經按臣釐剔安能遍天下哉一曰搜賊之苦窩主盜之腹心也皆隱而不供所供者多鄉里富民一唆於捕役再唆於獄卒有司未加詳訊先差捕役飽詐金錢劇餐酒饌舉郵震動合戶憂惶旋就剖明亦已家資蕩破况一番審鞫一番嚴刑箠楚之痛堪憐今日起解明日發監顛蹶之狀誰

乾坤正氣集

卷四十二

十一

憫乎一曰欽提之苦作奸犯科罪在必討乃此輩擁貲席厚遠舉高飛片檄下於原籍里閭盡爲驚魂旁及族姓旁及媼親候訊候詳淹沈獄底代賠代解顛連道途正犯之憲條未正無辜之波累多人急於納贖納贖不問仇攀仇指矣一曰被拘之苦沿海居民出海探捕一遇巨賊拘入劫舟至官兵犁擊眞賊駕躡先逃號救之窮黎反作陣擒之渠首武弁邀功冒賞槩爲剪髮剃眉眞僞未知駢首就法卽有昭雪已多瘐死獄中矣一曰隔提之苦與詞建訟寃民少奸民多嘗見被訟之家戚黨托言兎營訟師聚而蠶食淹留歲月奔走官衙曲直未分生涯已盡且一詞而撫按並行一人而守巡兩告此方結案彼復行提前贖未完後追踵至念此情景寧不澹然一曰詞訟之苦訟以平情尙不若使民無訟乃有司擬前官則寃抑不爲申明避嫌疑則富室反多陷阱奉上意則理

直偏在原詞護已私則嚴刑加於越訴甚且借名捐助濫罰嚴科自鋪堂掛審以至杖刑何地無鼠狐作祟自抄狀買差以至發落何時非阿堵公行又或方脫虐官旋遭勢僕寸椽尺地亦被投收半子一妻皆爲債估何地訴此誣怨乎一日窩訪之苦夫造訪之人卽應訪之人也乃應訪之人竄入造訪之中睚眦之仇可報也富厚之利可貪也有司不察而報之撫按不察而行之柔傭受罪豪猾長奸莫此爲甚一日私稅之苦大江以北凡貿易之家官爲給帖下至雞豚無得免者至隘口渡頭有少年無賴借牙用爲名橫加剝奪蠅頭未獲虎吻旋吞真有寃徹蒼夏者矣一日私鑄之苦私鑄之爲錢法害固也而南中爲甚每錢止重七分每百不盈三寸更有私鑄奸人控官請禁小民畏罪去之惟恐不速此輩一鑄一賣一禁一收利五六倍而小民何以堪哉一日解運之苦丁

乾坤正氣集

卷四十三

三

男紅女拮据倉桑布縷方成僉解隨及一切正價墊銀原足供辦解戶困累實因官吏侵分於是有錢糧已至而逡巡潛逃有身命俱傾而交納無日莫甚於臣鄉之浙西也一日馬戶之苦有俵馬有差馬俵馬自有原額復又僉差富戶屏息衙門屈首書吏方能半領官銀加以包說需求印烙使費一半官銀復爲烏有中人家無不立敗差馬間歲一僉爲禍益烈預畜多馬方供一馬之用公差驟至怒目咆哮鞭扑如麻哀號道側猶且折乾恤馬畧違所求則馳騁無法倒斃不時輿言及此良足悲也一日鹽丁之苦祖宗朝旣與以商地戶蕩再給之工本鈔米或四百斤而給鈔二貫五百文或二百斤而給米一石所以恤之倍至故餘鹽皆爲官有私販不至盛行今鈔法不通官米無給於是強者嘯聚湖湘高檣大舶吏不敢問弱者坵面蓬頭刮泥汲海淫雨陡作化作波濤欲

翰無課欲掣無鹽安得不急加撫恤也

陳致治大本疏

甲申五月

殿下渙頒大號沛發明綸雖爲繼統實同創業以仁厚歸羣情又以嚴肅定衆心此明紀綱飭法度之說也伏望申諭羣臣此時典制益當遵守勿以多事逐紛爭之端名器益當慎重勿以乏才啟倖濫之竇人才不可不愛惜而自媒之徑必不可開官爵不可不優崇而躐遷之階必不可有恩賞固宜溥當爲可繼之地勿生無厭之覬覦開釋固宜速當有可原之條勿紊罔貸之刑章庶幾紀綱明法度飭然後以輕徭薄賦收民心以舉賢錄才收士心以信賞必罰收將卒之心言守固言戰勝矣更有進者殿下一心尤爲紀綱法度之本念念敬天則天庥必滋至念念法祖則祖澤益靈長念念勤民則民情愈欣戴矣

乾坤正氣集

卷四十一

十四

馳報安撫鎮江情形疏

甲申五月

切照鎮江爲南都輔翼其在吳浙猶一身之有咽喉也臣初八日恭捧諭敕十一日遞至府城時巡撫臣鄭瑄巡漕臣白抱一常鎮道臣張調鼎皆在其地臣會集地方有司紳衿耆老宣布敕諭颺殿下英明恭儉與民更始德意無不歡欣踴躍臣卽一面知會撫按督率有司欽承諭欵務使蠲者實蠲減者實減折者實折豁者實豁薦錄必當糾劾必嚴當卽陸續奏報其大利害亟應興除者亦在博訪詳諮另容啟奏至京邊錢糧近已停徵飛檄催償以期速於輸解惟是西北被難之民蒼莽東南皆駐京口爲歸人情不無洵洵臣已發牌曉示令擇便安插併嚴飭歇家旅店渡子腳夫不許乘機需索以爲撫卹流稽之計撫臣鄭瑄駐江口統率水陸官兵六千餘員名戰船三百餘隻防守甚嚴池州參將黃斌卿

亦統舟師前來且聞浙江撫臣黃鳴俊過發入衛有兵三千至江
大壯壁壘之色漕臣白抱一督催漕船出閘入江者凡千餘隻可
使三軍宿飽常鎮道臣張調鼎同鎮江知府錢良翰推官李曰池
勸練鄉勇合一城之內不下二萬餘人此皆諸臣之竭心殫慮以
屏翰豐鎬者也在今諭旨方頒仁恩初布而臣工堅保障之心士
庶同歡戴之念我殿下再造邦家又安四海於此可卜謹具啟馳
報忝慰睿懷便卽往蘇常一帶矣統乞垂鑒臣無任悚息之至

馳報安撫蘇州情形疏

甲申六月

竊照震澤之區其人多慷慨好義然而一呼羣集向前所稱易動
難安者也自國家慘變驚傳青衿者流念先帝教養之德一時痛
憤於是朝廷哀詔未頒先爲聚哭之舉臣子逆狀未確先爲追討
之文不知忠憤義激稍一過當便開小民搶攘之流弊此吳中士

乾坤正氣集

卷四百二十一

五

習民風所以有大可憂者在也臣敷宣德意綏緝地方與學臣宗
敦一往返商榷欲於此痛下鍼砭稍爲轉移而積習未能頓易如
奸民焚搶一事發於蘇郡延於常熟臣已另疏報聞其他觀望欲
發因有禁約而止在蘇郡之搶監生章程家當經按臣周一敬杖
斃首犯吳姚二賊餘如張君甫五四柳示羈監此臣未到蘇之舉
也臣於五月二十四日抵蘇城而民間已熙攘如故惟是時當插
蒔雨澤未降三農有閔閔皇皇之狀臣於蘇城之後按至常熟崑
山太倉吳江一面頒布赦款卽皆率屬虔禱稍有霑潤而太倉崑
山則苦旱更甚太倉州又因劉河淤塞潮汐不通以致車灌無地
其被災在諸邑之上當俟秋成時勘實分數爲民請命以徼浩蕩
之恩至於伏莽奸徒此中所在皆有吳江縣匿名謗帖駸駸見端
知縣葉翼雲素爲士民皈心是時鼓勵士伍先期撲滅奸渠吳美

中吳應卿等城鄉迄今安貼此其才識實有過人崑山知縣楊永言新任而能冰蘖自矢士民感之頗得消弭之要此皆有功地方合請敕下從優紀錄武弁守禦著勞者另容核請乃若嘉定縣知縣曹允昌莅任不過三月而乖張棄節媒褻不簡業已傳播於四方臣遵奉敕書訪定實蹟飭令離任聽撫臣鄭瑄見於伏命參劾暨聞該縣士民有訐告科臣申芝芳自父及弟詞至七十餘紙幾幾乎以討逆發難者臣皆行蘇松道臣程峒審究要在平情以飭法也若夫蘇屬錢糧最爲浩繁而侵併相仍其弊極太臣已嚴行清察尙未就緒然總其大綱欲使朝廷蠲減實惠徧及小民惟有刊布宏光元年易知單則方使小民知蠲者實蠲減者實減留物力於閭閻堅赤子成城之戴臣不敢不勉圖之統乞聖鑒施行

補薦直節兼陳異寃疏

甲申六月

乾坤正氣集

卷四十三

六

臣聞平時無直言敢諫之士臨難無仗節死義之人故言官者當培養以壯在山之勢無逆抑以開媚竈之風在今中興伊始尤藉封駁糾彈有李勉而朝廷尊事在今日止聽亟需矣前日冢臣面請起廢言官會以原任省臣章正宸等原任臺臣李模等面舉今閱邸報見所開列亦已濟濟但向來一鳴輒斥而風節表表使人景慕者尙有原任省臣熊汝霖陳燕翼原任臺臣林蘭友註誤原屬非辜其議論極正其才情極雋者尙有原任省臣方士亮胡麒生是皆可以承皇上之環命伸展布於梧垣柏署之間者也他若籍隸西北者生死未保不敢併及籍隸三吳者皆在覆核行當彙薦也臣尙有確見異寃者如原任省臣曹履泰靜密寡慾夙稱端品祇緣同郡無賴等項眞被緝東廠理刑必欲得一營官者以實之眞因微騰遂誣履泰又必欲得一受營官者以實之遂蔓誣原

任銓臣王重弓省矩省矩抱冤致於自縊履泰王重一同戍遣此實數年來極冤極誣之事從來冤情毫無影響一片構成未有若此案之甚者也爲此抑鬱於中久矣第因向在田間一出山而旋遭寇警未能爲揭白於先帝之時今新朝昇建於羣枉畢佻豈容侍從之臣有此覆盆之苦竊以爲其冤宜雪其人宜用也統乞聖明裁鑒敕下吏部都察院復議施行臣再有請者言官例轉原以磨礪將來不必分內外之見惟是以軼羣之才品無端裁抑輿論難平如原任臺臣徐殿臣歷效忠讜久著丰采方藉以飭士豐錫何故卽一麾分臬臣實深知其人敢不附於公論之末但賜環大典出自特恩非臣所敢請也

陳三大弊政疏 甲申七月

爲新政要在明刑持平貴有端責謹陳三大弊政伏乞明旨禁革

乾坤正氣集 卷四十一

七

以收拾人心光昭盛治事伏惟皇上以垂統而兼創業凡典章法度有宜因亦有宜革者要必翻然更始使海內翕然快服乃足以收拾人心向來爲搢紳愁慘小民毒痛道路側目羣情解體者其弊政有三曰詔獄曰緝事曰廷杖臣請備言之先是洪武初年天下官民有犯或令收繫錦衣衛司事者因以非法凌虐高皇帝乃於二十三年焚其刑具以所繫囚送刑部審理是祖制原無詔獄也後乃以鍛鍊爲功以羅織爲事雖曰朝廷之爪牙實爲權姦之鷹狗口詞從迫勒而來罪案聽指授而定卽舉朝莫不知其枉而法司無敢雪其冤酷慘等於來周平反從無徐杜者此詔獄之大弊也洪武十五年改儀鑾司爲錦衣衛當直駕侍衛等事未嘗有所謂緝事也迨後東廠設立始有告密之端用銀而買事件得賄而警刑章無藉之兇惡輒多倚藉以投充番役之亡命反借交

通以倖免於是飛誣多及善良赤棍立致巨萬招承皆出於弔拷
怨憤充塞於京畿欲絕苞苴而苞苴托之愈盛期緝奸宄而奸宄
未能少清此緝事之大弊也若夫刑不加於士大夫原我祖宗忠
厚立國之本及於逆瑾用事始有去衣受杖者刑章不歸於司敗
撲責多及於直臣本無可殺之罪乃致必死之刑蓋當血濺玉階
肉飛金陛班行削色皆氣短神搖卽恤錄隨頒已魂驚骨削矣况
朝廷徒受拒諫之名天下反歸忠直之譽磨勵困之靡效榮辱遂
爾無權且也夷堂廉於狎狴雜仙仗以桁楊是豈明盛之休風大
失君臣之分謹此廷杖之大弊也臣讀周禮以三典歸之司寇虞
書以明允敕之臯陶固知帝王明刑原爲急務而祖宗朝以戢暴
付法司以詰奸責五城原亦職有專官責有專人者我皇上如天
之仁如神之智深思治亂之原亟圖變通之要方且以欽恤廣皇
乾坤正氣集

卷四十一

六

仁以腹心待臣庶三者弊政萬不出此然更乞渙頒明詔永行禁
革昭示萬禩海內聞之有不易慮皈心仰頌與朝第一美政者臣
不信也臣有事軍旅尙未交代猶是言官敢瀝款款血誠用勦中
興盛治矣

祁忠惠公遺集卷二

明 祁彪佳著

涇縣潘錫恩校

迪吉錄序

余嘗讀易至幾者動之微吉之先見而知自天命以來止有一善更無惡對故止有一吉更無凶悔吝對所謂善之長者蓋不落於善者也自有善有惡王文成歸於意之動而爲善去惡之工夫便當急起勿失卽此日常間自安自便苟且依違之念若以爲無有大過而不知便足直入迷途永無覺路嗟乎人生非善卽利更無別徑可容參半以行一舉足便宜危惕也惟不能直下了當如孔門之言克己於是須時時剷除時時猛省不得不破暗於炬借正於鑑覺世者重有憂焉見之於心乃更徵事徵之於吉凶乃更言禍福動之以現前乃更說因果或撥其喜心而使趨或懷其懼心乾坤正氣集 卷四十三

書

地理統一全書序

余聞之往記前哲建邦啟土陟嶽降原於陰陽風雨之交尤虞廩然慎之故堇荼昌周楚堂起衛要是聖人重事耳迺青烏者流竊其意而不得猥欲盜造物一坏以徇委蛇最下者目未覽雪心隻字而驕語景純其愚人者無論卽稍窺相塚書者又未免按圖索

局見一阜之墳起者則曰似圖中某龍見其環揖偃伏者則曰似圖中某案某砂非是者卽眠牛勿問矣又安望其辨耳角若涵澠券福應若桴鼓哉則不曙於理之過也夫脈有衰旺氣有聚渙此其魁鉅也微而生尅微而緩急微而休咎之針芒也斯所謂理也理非精弗剖非書弗譯神而明之存乎其人余勾稽樵川卽知有閩知名之士兩余生亟進而見之翩翩玉樹塵屑霏紛固已知發祥之有自矣語次尋繹出其尊人仰止翁所輯著堪輿全書欲余言以弁之余覽其書大都析緒幽渺證古該博幻詫天星而專主龍峽水爲劉文成千古功臣其要歸諸天理溯流自本豈非古所稱仁人之言耶自是書出使枵腹者母以空言欺世膠柱者母以糟粕賈名倖福者母以薄修取效爲人子者母敢誠信不必以悔先人之魄余氏之所全者大矣豈曰書之云乎時戊辰中秋夕

乾坤正氣集

卷四十五

二

山陰祁彪佳書於莆署之嘉樹軒

孝經小學旁訓序

今天子縈情文治崇重實學拔五經淹貫之士以式天下復頒布孝經小學廣勵學宮俾四方人文翕然蒸動而臥碑敕諭又高皇帝棧樸作人之遺先聖後聖其揆一焉武林鄭壽子取而旁訓之徵序於予子因憶壽子先公孔肩先生與先子交三十餘年所子伯仲氏又與壽子昆季交兩姓父子兄弟文章相勗道義相成每團欒斗室惟是以忠君孝親下及灑掃應對進退之節疊疊規勸蓋三十餘年如一日也壽子讀盡遺書究極經史奧義於國朝掌故尤所諳習至其言規行矩家庭間有太邱眉山之風是壽子爲此編不特能言之而能行之者也又不特以躬行實踐爲行而以公諸同志詢諸後學合天下人之行以爲行者也今日表章聖學

他日潤色皇猷其有功於世道甚大子譚讓文質無所底借壽子評騰古今終日夕尙不足以窺壽子之淺深又何能爲之序乙亥仲夏山陰郝彪佳書於西湖之越閣

石雨大師語錄序

自五燈分焰洞上一宗精詳綿密辨魔揀異眞如寶鏡高懸狐妖落膽救瞞肝大病之良藥也一椀頭亂統禪望崖而返矣乃反從而譏之曰是義解也是教理也猶越人安於斷髮文身見章甫玉帛而譏其爲繁文縟節耳夫一棒一喝出自德山臨濟覲面提持自是迅雷掣電利劍慧刃奈灑末人滴稍具一知半見者能倣而行之矣久之而狂狐野干之屬竟冒而行之矣惟洞上宗旨慧刃利劍卽是玉線金針掣電迅雷具有正偏回互以儻侗承當之不得以意識湊泊之不得苟非徹法源底脫盡窠窟烏能達五位之

乾坤正氣集

卷四十三

三

妙用出三漏之網羅哉從上諸大老潛機密用至今日而猶有升其堂入其室者寶鏡之光輝其佛法之命脈乎中興洞宗而爲灑王之周宣漢光者江西則有壽昌兩浙則有雲門焉石雨大師雲門之法嗣也知見超越機用敏捷道大行於閩浙之間眞雲門克家之子憶癸亥歲雲門大開鑪鞞集龍象萬指而蒙印可受付囑者乃爲兩少年沙彌石雨三宜二大師是也當時一軍皆驚而後皆服雲門擇法之精益分毫不爽益信雲門深得曹洞不傳之祕而辨驗之下自能棄承取金進璠璣而退砮砮也大師初披緇於武林法相卽有俯視一世之概一鉢飄然寸絲不蓄遂爲新安諸名士所重而納交焉非所謂虎生三日氣已食牛者乎大師門人集師語成錄予讀而快心焉直截與精密蓋兩得之矣亟請梓之以救末法瞞肝之病而因弁數言於首予之師事大師猶先大參

之師事雲門也不復以不文爲辭矣

李止甫畫大士引

延祖吳侍御年譜兄事者也把臂入林掀髯謂余曰清風朗月可以引遠思流水行雲可以滌煩想名衲高羽令人生道心韻士墨林令人長慧念旨哉言乎吾儒謂陶染禪家所謂薰修也止甫李君上根法器恢恢頓門以畫入禪以禪會畫優曇鉢華浮湧毫楮圖繪大士妙相低徊慈愍無漏菩提惟願見聞隨喜皆獲舍離貪欲恒住寂靜莊嚴三昧利益當何如

昌化邑令顧公碑記

國家黜陟之法誅奸雄於旣死發潛德之幽光者莫如論典次莫若郡邑名宦之祀外吏之不肖者生可以其勢力財賄逃罪甚則微幸華遷而名宦一席地必不能竊之於身後昌邑國朝至今幾乾坤正氣集

卷四十三

四

三百年令於此者多矣而載在祀典者二人耳前爲余公猶龍後爲顧兩如令公公諱謙服字民服吳之崑山人以明經與先大人執友孔肩鄭公圭先後司訓長興旋尹昌中六計之廉能昌彫邑也民業薄輕死蠹伏衙毒氓水塘塞煙絕丁徵額糧匿農怨畝間商吁市病勿藥死無斧者棄中塋而邑依山多佳木漆林不肖吏泄此日問榷梓勤丹獲几榻民數不知艱罔恤懸魚拔薤風邈然或致洊臻早潦蜂起盜賊公下車民苦寇昱嶺藏狐豕則斷徑夷林設柴柵木城以禦謂險不若人申命野虞恐商勿通爰謹啟閉而民苦去一俄又苦飢公曰朱崇安義鄭青州法可行今日民顏不菜至若訊保甲行阡陌數十年水利復數百畝隱糧清歌長生重誓嚴俗淳吏弊革無告民開創水柵崇芹宮郊固土勵可謂能矣尤潔清自好却筐篚竿牘革公儀羨餘粟取損俸佐餼施餌豔

之利山判屹焉水如綺惟客漆若鑑惟賈五年一日袖清風興膏雨不廉而若是乎方今急人得能吏安問欲廉者卽無能尙賴乃能不廉廉寡能又往往是第能欲損能廉之材廉利窄又然惟公兼之廉布能故瘠官肥民咨嗟流涕以請命能輔廉故颯切抗辭出爭利害百折不回廉故民樂能故事成樂民成事者國恃不虛然卒偃蹇小官不獲大用豈非未膺科甲選乎士人以明經訓導起家不顯當世詎獨一公同時如鄭公圭與公出處治行若合符皆以資格限僅得一平轉近者稍破格遴才公在今日必建節鉞靖寇氛上配廟祀然而鄭俎豆於平樂公俎豆於唐昌几筵歌思音容相望而子若孫皆國楨千秋萬歲不滅者名彼微倖華遷者竟安在哉予雖不文敢不從士民之請而紀其畧於貞珉以告後之令唐昌者

乾坤正氣集

卷四十一

五

施藥紀事

歲丙子自春迄夏越中痢疫盛行死亡相枕藉有闔戶僵臥無一人治湯藥者蓋昨歲杪雷電非時伏陽凌陰氣以出識者已知有今日之災矣季夏之八日舉放生社於六竹菴友人有言及者共相惻憫若痲痺乃身因憶己庚之間里居時名醫童君五萊及禪師麥浪咸有施藥議時同志寥寥難之故未及舉機緣若有待也金如王先生適在坐卽屈指商榷措置中窾彪於燈下草列十條毅然以必行爲念王先生走告之同志者人踴躍願從事焉乃設局於光相禪院以王先生主局中事延名醫十人每日二人詣局授方人各六日及午散歸則太醫姚同伯繼之己而不暇給更延二人益之凡十三人其司貲司藥司記司咨司計諸同志分任各恪乃務出入必覈登錄必詳酬對必當治方合藥尤稱煩瑣躬親

之必慎必敬卽人自謀其身自理其家不啻也問藥者有過而歎曰嗟乎使今天下之爲民牧者盡如藥局諸友之若自謀其身自理其家也天下何患不治哉諸名醫以菩薩心現醫王手或按古法或出新裁宜攻宜補若洞垣然各以其期赴局而童君五萊傳君會與袁君六卿則非其期時亦惠然一至雖炎暑焦灼穢氣薰蒸不避也貧病人聞諸醫名則喜及投劑輒效則更喜歌頌載道暨外邑鱗集麀至又恐後先失序而扶攜不前則有上人尙德賀君璠瑛持籌分給以序而入人人得詳告以病繇而中及膏肓故奏效最捷初施藥議起彪與家仲季首捐微貲設募簿十餘扇諸友分領之邢君吉先復倡議日約費金錢幾許合數友以朋舉一日之貲不足彪再捐之時方早暎甚民間有瓶罍之虞藥貲以不

給是懼其給藥者爲痢疫瘧瀉四種雜證止授方而每日所給藥已有至五百七十餘服者矣初約其期以匝月迨孟秋望後之三期期已滿活人約以三千計僉議且散局王先生曰未也病不全瘥人方待命而中輟之心其忍乎時局中告匱無一文餘且缺藥貲數十金衆更難之王先生曰吾輩苟有是心天下事盡其力可也若夫成毀興廢有數存乎其間况乎苟盡其力天下事無不可爲同志友悚然興起座間卽有首捐一金以倡者友人遂多和之頃刻便得金十計矣翼日告之諸太醫復鼓舞不倦脰脈授方之外向固有攜所製丸劑并施者茲更兼領募事而童君五萊所募較諸友爲多因再得二旬有六日爲後局王先生以勞致病病已復勞勞已復病終無倦色在事諸友臥不貼食不甘體爲之憔悴後局將竣之旬日前疾漸瘥取藥亦漸寡以是知諸友不憚一己

之憔悴其爲人噓枯潤朽也多矣中秋前一日告兩局之竣於石梁陶先生遂舉放生社亦仁民而愛物意也社集蔬酌有舉卮屬王先生推其勞者王先生歉然若不足曰有諸太醫及諸友在且此役亦將以是已乎窮鄉僻壤接踵來者奈何令之泣路隅於是復留同伯姚君仍爲授方以所餘藥分給之稍取其值資薪水越兩旬乃解人亦罔不稱便也窮無窮極無極儒者之心洵若是哉是役之始經畫稍難倘歲歲而踵行之便易爲力乃卽目前之聞風繼起已有朱君仲含吳君定宇吳君泉石其他持藥餌活閭閻人更不可數計聞武林亦有欲爲此舉者是吾輩只此不忍一念倘能擴充不特在一時且在他日矣不特在一方且在四字矣其各勉之哉爰立名醫之姓字於簡首中載募貲出入之數而在事諸友并志之草畧以記其始末有如此

乾坤正氣集

卷四十三

七

施藥緣起

彪佳比來屏跡草堂時與家仲季盤白石嘯清風相羊終日幾不知人間事已一日客有過予者語及方今痢疫流傳民多天札而窶人子尤爲可憫蓋彼日燒桂煮玉卽無事不能一果腹一旦踣臥那復有囊中錢以故望一七如九轉丹不可得頭纔岑岑痛生理便盡或一家數口相視須死彪聞之不禁蹙頰傷哉夫人獨不具耳目鼻口心知百體者哉獨非父乾母坤與吾同胞者哉胡逢天之疾滅若斯也其有以自召也歟顧吾思一室之內父母忽爾震怒凡爲之子者苟不多方營救未有獲免於戾者矣然則吾輩今日尙得盤白石嘯清風坐而視彼顛連以死耶遂與家仲季商之金如王先生思以遍告之仁人君子釀金市藥共圖扶援卽數服咬咀未必盡如九轉丹便能生死人而獲盡吾輩不忍死生人

一念庶不至推同胞於膜外耳况乎災沴薦臻吾輩同此一世界正恐不能自保今尙得探囊中錢展我四體振救他人固屬幸事而况此不忍死生人一念實與上帝之大德相副用以禳厲氣而迎天和不難於是享平康之福而吾輩亦恒得逍遙容與於山水間又未必非一身一家之利也彪自揣綿劣望我同志合力成之謬有數條謹列於左抑彪於此更隱慮焉吾鄉地狹民稠即使歲事屢登亦苦食衆而生寡况今江右已見飢荒金衢之粟亦且驟湧萬一吾鄉旱澇不常竊恐轉輸旣艱匱乏必甚十室九空之民未必有親上死長之義昔止憂荒今乃憂亂凡我同志正宜預爲講求勿謂青州之全活盡是有位者事也乃卽此貧而病者因病而更益其貧雖殘喘獲延而典鬻已盡一飽無時不以病死亦恐以飢死矣夫歲或不稔己無慮也歲或稔矣而豐者自豐儉者仍

乾坤正氣集

卷四百五十一

八

儉以人事之不齊致天行若有憾更可痛也愚意助藥之費尙少有贏餘則於就醫取藥時所列貧病之家分地計貲畧爲賑恤雖施予有限亦足稍展吾輩無窮之心乎敢并商之伏承指南

施藥條款

一置買藥貲及一切雜費每日約四五金除彪自行捐助外金立簿十扇分發同志之友十人更各遍傳於諸同志者隨意捐助多寡勿拘但須卽時交付領簿之友陸續發至季超家兄收貯以充諸費募完之日原簿并發還家兄以便刊刻成書布諸善信名號

一延請越中名醫十位彪設卮酒訂約每日煩二位至局診視共襄茲舉大槩以一月爲期至於在局一切料理并請太醫姚同伯足以任之

一醫局定於越王祠光相寺其地水陸交通便於攜載診視

一投藥先須診脈凡就醫者訂以卯辰二時至局太醫每日早至
傍午而散蓋不特太醫欲應別家延請且恐過午則病者往返滯
暑中更益其沈困耳

一病者或在危急不能扶攜須遣家屬詳語病繇以便付藥

一太醫診脈之後止煩立方其置辦藥料或同志各自推擇或始
終其事或輸管數日預相訂約勿致臨期互譏

一太醫診脈立方司藥諸友照方付藥旋書病者名號住址於方
內每日彙作一本立爲醫案俟再次取藥即簡閱舊方斟酌增減
一看病取藥恐有參差混亂今議置看病籌五十枝取藥籌百枝
俟入門之時照其先後付籌自第一號至某號止診脈付藥卽照
籌爲序庶免擁擠踣跌之患

一寺中前殿備設卓櫬以便病者憩息至炊爨奔走各須數人煩
乾坤正氣集 卷四 五十五

九

同志之友輪日至局或接待賓客或分督僮僕務使恪恭其事

鄉勇團練事宜

一四鄉相賊衝等處地方立一監紀卽於各保長中推擇謀勇出衆者或舉廢弁而以
附近鄉紳文學提調之畧如城守之制

一大邨大鎮俱立團練之社四旁小邨附之監紀至各邨鎮相地
立社卽令本鄉保長統甲下點選鄉兵每甲出二名如塚夫例贍
犒之資皆出富家先行會計

一五人爲伍二伍立隊長百人立哨長未及百人與已過百人者
俱一體統領仍割哨長以把總名色

一每社各立教師一人本邨鎮無其人別募充用技藝習熟之後
教師可撤有願投本社充哨隊者聽限三入口操演四季聽官操演

一各邨鎮隊伍編成之日一填官發印簿以備驗犒一另填一冊

報之監紀仍自存一冊上書統領官某人第幾隊隊長某人鄉兵某人俱書的名年貌

一操演之日監紀給銀一錢把總給銀八分隊長給銀六分鄉兵給銀四分聞警備禦之日各增二分餘日仍聽各治生理不給工食教師同把總之式如係外鄉者各家輪供飯食

一各邨鎮於隊伍之外另立塘報一人以有力健走者充之其贍資同隊長之式

一遇敵之時能擒斬一賊賞銀十兩平時擒獲強盜一名賞銀三兩竊盜一名賞銀二兩擒獲奸細一名送官審實賞銀二十兩俱於殷實公派或候官給

一每兵給青布號巾一項黃布號衣一件後用白布書某社第幾隊十人之中以五人執棍兩頭用鐵包裹三人執苗葉鎗二人用火銃弓

乾坤正氣集 卷四十三

箭每隊小旗一面上書某社某隊每哨大旗一面上書某隊統領另備金一面鼓一面號頭一箇

一本邨每隊各備船一隻卽於殷實借用

一凡操練及聞警之日統領官鳴鑼三通放銃三聲卽齊集社廟一聞警之日每隊輪一人出夜巡擊梆爲號

一監紀探有消息密封塘報一面報官一面傳各邨鎮外用一單上書繇某邨某鎮遞至某處塘報人挨邨遞去各邨鎮仍互相傳

遞以便整朔固守

一各鄉勇悉聽隨便調度互相策應

一統領官務常申約束不許各隊伍挾仇爭毆酌賭生事如統領約束不嚴監紀立行更換重者鳴官究治

一監紀相地立社交送示劄印簿之後定於五日內點選齊備聽

行掣驗如推諉挨玩量治軍法

乾坤正氣集

卷四百三十一

七



祁忠惠公遺集卷二

涇縣潘錫恩校

祁忠惠公遺集卷三

明祁彪佳著

涇縣潘錫恩校

越郡先賢祀典揭

原任福建道監察御史今告病在籍祁彪佳謹揭爲越郡賢祠告成先賢祀典未正仰祈鑒裁攷定以安神靈以勵世教事竊念鄉之賢哲禋祀巖宮上以表章名碩下以風勵來茲典至鉅也郡中名賢自漢晉以迄皇明熠燿史傳稱爲最盛祠宇頌頽鉅典幾淪於草莽彪佳不揣謏劣合諸賢後裔請之當事公祖捐助鳩工輪奐一新明禋載肅乃攷之先賢載記者則私衷竊有未愜敢以一言請政焉夫郡合八邑而有庠則郡庠賢祠亦合八邑之賢而祀之者故在邑爲分祀在郡爲合祀此定制也乃我明之諸賢祀邑庠者十之六七兼祀郡庠者不過十之二三此已於祀典爲未備

乾坤正氣集

卷四十三

一

然猶曰進學有郡邑之分批允有人郡入邑之別也至於先朝諸賢又何擇焉今查府邑兼祀者止三在郡則十餘位其祀於邑不祀於郡者尙七十五位在邑則濟濟在郡則寥寥似非所以爲明禋光也豈當時之稽覈有悞抑後來之湮沒相仍耶似宜稽之誌乘合以輿評凡在郡者分祀於各邑在邑者合祀於本郡則薦享不替而神靈庶其妥侑矣乃若懿美已彰於古今而崇報竟缺於俎豆者如梅子真之高節清風山川市里皆被其名又如嵇侍中之血濺帝衣史冊詩歌咸載其烈乃賢祠見遺豈非缺典况其他名節高人幾於晦蝕者更未易屈指數也伏乞當事公祖轉發有道搢紳詳加攷詢量爲增置期於無濫無遺使先賢之表章不虛而後學之風勵益遠是在當事公祖興廢舉墜之功德豈淺鮮哉至於我明諸賢亦有應祀未祀者或俟他日之論定或俟子孫

之陳請寧嚴母寬今皆不敢議及也除送府學申詳本府轉詳督學道議行外爲此具揭須至揭者右具

墨蹟藏山陰沈復榮家

候上司莅任長接稟

爲恭迎台駕事台臺鍾震澤之祥才兼文武應名世之瑞望重斗山旌節遙臨蘭渚壺山增色福星所指九華天馬生春茲當榮蒞百姓歡呼雨露遍濡閩海竹馬已滿郊衢卑職緣職守之羈未能致越疆之候謹遣蟻役賫稟道旁臨稟曷勝鵠望之至

致鄭守憲書

伏荷老公祖台臺旋挽天行拯援民瘼言言中窾事事合宜此天行化災兆祥之時亦民瘼轉危爲安之日也至於不鄙芻蕘倦切垂詢尤使治某感極忘身不禁饒舌竊思救荒諸務老祖臺居高倡率要在總其大綱通糴召商斯爲根本至計老祖臺預切圖維

乾坤正氣集

卷四十三

二

台米旣來溫糴旋往矣其次則在崇一事權五六月青黃不接民食更艱而區畫之難日甚一日近來荒政監巡責成司理明旨向已通行院檄更有端委以司理陳公祖靈心敏幹在在徵學問經濟之全於今詳諮博採業已端緒兼舉伏望老祖臺特爲委重俾之畢力貫注太公祖兩父母設處錢糧以圖共濟如此而奉宣德意必得暢滿充周矣至於五六月或粥或賑昨者集議文成祠中公祖父母採諸紳衿衆論欲使鄉間設粥必先安戢城廂惟恐城中亦行設粥則聚集流移或有未便是以將給米之法再行募助以寬其期所慮物力已窮給賑不足則核減飢口酌裁米數而官銀官米量以濟之其流移向在城中者仍附入各坊并與給賑而僧人之挑粥與庠友之賣粥皆所救濟流移者夫如是而城中之粥可不必設矣城中旣不設粥若獨設於附城四廂則傾城就食

囂亂必滋是以四廂之士民設粥亦不敢任也無己仍以城中之規行之可耳既已安戢城鄉然後直議鄉間之事設粥之難若夫入而知之矣然地方遼遠民力困匱欲求一法以代粥不能也就其中而詳計之庶惟多立粥廠乃使勢分地近害少利多治弟其先擇忠誠文學每縣分作五區每區總理以四五文學諸村諸鎮配入區中總理者又從村鎮推擇每廠一處必得分任數人幹理其事如臂使指呼吸相通詳載小議設粥事宜此城鄉規畫之大略不敢不奉聞以祈老祖臺裁定者也昨蒙面諭云此番粥費須在官設處仰見老祖臺體恤民艱靡不曲至但所費繁重安能盡仰給於在官惟各坊給米之寬期與各廠煮粥之創始不得不煩官發米銀用示首倡譬之九轉之丹以點頑鐵民間得此自當倍加鼓勵乃設處之策未易輕言老祖臺破格宏施如天垂惠此外

乾坤正氣集

卷四十三

三

兩父母已各認措米二百石鹽臺公祖已有捐贖二百金矣然散之坊村爲數有限不揣愚見謬陳設處之數端不識可供採擇否台州糴米將至計米價盤費約一兩五六錢發糶之日較今市價少減尙可餘二三錢之數千石之內便得二三百金此一項也各處皆有學田不知做鄉若何或有在官田地可變賣充賑者乎以治某所知如稽山書院創於前任蕭太公祖捐田三百畝碑記可攷後聞因事變賣所餘尙多歷年田租必甚侵隱所當查追此又一項也鹽臺存貯做鄉有穀千石昨聞申行非奉旨不發昨治某曾爲面求已荷俞允乞老祖臺致劄鹽臺必得一面題請一面發賑兩縣倉穀除正月間給散之外或尙有稍餘須盡數支給此又一項也昨見都中會議大司農覆疏有開事例開贖銀二款不知做省亦在通行之列否內如遙授復官及贖軍罪得其一二便勝

於銖積寸累倘做省未有部文不得比例乃如生員之以文義黜
退降等者或徑可移會學道每學量報二三名便可得銀米若干
此又一項也缺額兵餉或爲別項支用若軍糧者向有事故存積
聞已前所積蒙諭撫臺公祖取爲入援賠餉之用今又數年矣不
知更有存積否或可詳請量支百許此又一項也又如各村社廟
俱有社貲向以備演戲之用今憲禁申嚴此項存貯多者數十金
少者亦數金亦可充本村之賑此則於無可搜括之中聊爲不得
己之計者也如此引伸觸類煩老祖臺一番垂神必可以爲續命
之膏甦涸轍之劑也昨又蒙面諭爲將來地方圖其永利惟有社
倉一法老祖臺見遠慮周超出尋嘗萬萬做鄉有一生著杞人籌
越其言頗可採謹附呈台覽諸容晤陳統乞垂炤又啟者告糴之
處不宜零星給批治弟向會言之府公祖前日台州官批阻滯皆
乾坤正氣集

卷四百三

四

零批騰價以悞之耳治弟因思設處之策倘台州官批之後或不
妨零批則府公祖處乞凡一批者令其自認告糴之數每告糴一
石先納銀一錢然後掛號發批既可得米以安民又可納銀以充
賑或又亦一項也并謬陳之伏俟採擇

致王郡侯書

雨雪載途眞有天時與人事交窮之狀所_謂老祖臺德意淪洽不
致有洵洵他變耳伏蒙台召洽某已稍悉愚悃惟是今日之事惟
速惟斷蓋環觀城鄉似有朝不及夕之情矣刻下急著在每米舖
當舖給一簡切告示令其照常貿易米舖不抑價當舖不減息如
有刁民強當強糴者立刻取死斷不輕貸庶使開舖者得以安心
此一著也在城在鄉多給告示內述老祖臺現議召商通糴儲米
平糴募衆給米貧民旦夕有望如有捏造訛言及強借強糴亦申

以立刻取死之例此又一著也各坊分查貧戶乃安人心之大端今每坊先給告示令總甲聽候任事文學細查饑戶該總如有賄報及遺漏等情重治不貸恐諸友之查須在一二日之後卽刻以此慰通城之嗷嗷此又一著也前二示刊刻不及先乞書寫數紙立行頒示此三者皆虛聲而鎮定消弭開手不外乎此餘容次日再布先祈垂炤畱神不勝馳切

又

荒政畢舉煩勞台神治某佩頌猶深感銘最切伏蒙頒示王園長公祖之札知寧郡亦在苦飢此地無可仰望矣今杭州一路竟不能通江楚之米徹鄉雖值豐年亦且半藉而當茲歉歲反不得資藉於百一是不且坐困乎目下米價暫減皆本地囤藏之家懼人搶掠爭先出糶故市上稍有餘米此如無源之水頃刻可竭若外

乾坤正氣集

卷四十三

五

販究竟不通則價必愈騰人將復逞弭伏之後倘更有潰決在被之膽智益橫在我之伎倆易窮此時收拾轉難眞可爲之寒心也於此殫心畢慮惟有通糶一著幸有成公祖垂念饑黎慨許告糶伏乞老祖臺督發縣本附以商銀速爲第二批之計必得一往一返源源相繼乃使凶荒可恃此眞徹鄉續命之膏也萬望老祖臺時垂台神倘縣中措處爲難亦不妨多寡量力蓋旣已差官須有官銀與之方爲名稱其實惟官銀不足而後以商銀附之總作一批可也敢此附佈統祈鑒原不勝馳切之至

又

伏拜台教仰見老祖臺之慮周而念切也三復之後感刻無己敢不敬摠愚忱祇對明問台州商米附批而來費老祖臺幾許清思乃得抵越今市價已二兩七錢頃聞更增之矣較之台價溢出一

兩之外減其價以惠平民誰曰不宜但若減其價而聽彼在舖白糶彼糶戶不知限制將來各舖之米藉口告示俱欲求減卽一舖之中別處發來之米亦藉口告示俱欲求減則反有脊脊之狀矣商人之奸詐者又或量以數十石作台米出糶其他仍復圍畱以索高價未必不相持而閔昨者山陰父母有減價之示汛兵強糶幾於罷市藉老祖臺同道臺速出明示乃得開糶炤常不致洵洵他變今亦不可不深長慮之也或者以台商之米設局另糶如昨年故事乎但恐一糶無餘貧戶多不能措本而奸民則多糶以射利且設局另糶未免有搬移之地有監押之人恐亦非商人所深願今日以通商爲一義故須招徠之意居多卽明知其獲利之厚而有不必一一以計之者以治某之謬見求老祖臺召集台商面賜詢問倘設局另糶而便也則事在可行倘果有如治某所遲疑

乾坤正氣集

卷四十三

六

者或令其面酌一納銀納米之數每一石或納銀一二錢或納米幾升幾合在老祖臺可取以爲各坊極貧之找賑使極貧者實實受惠無奸民多糶射利之弊而商人得以任意出糶無他疑阻當歡然樂輸似爲一舉兩得昨蒙鄭公祖詢及治某亦以此具對伏乞台裁定奪至如官米一千二百餘石老祖臺定價二兩極得其平但須令各坊任事者核定次貧總籍其數每戶一口可糶若干計戶口之多寡分發各坊米舖若治某前日敝坊平糶草創之法使次貧者得零星糶用而官銀則可一并完納更所祈老祖臺之留神者也兩旬不雨早禾無望老祖臺秉誠齋禱可得甘霖但三江閘板不能築土堅閉仍待逝波更乞嚴申禁令臨啟可任馳仄之至

城鄉之間粥廠將竣議者紛紛以爲當此時晚禾未登早穀有限
典鬻愈竭口食奚資賑之於米價方騰之前撤之於米價未平之
際譬如待哺嬰兒遽奪其乳數旬而棄之與數月而棄之一也前
功可惜後效宜補其議則誠是矣然治某審時度勢則頗覺有難
行者四今日粥廠之舉全賴上臺勸諭與責成兩者並舉然後六
十日之期無敢或缺民間祇遵亦云謹矣再欲議延惟當勸諭若
更加以責成之法則在上爲不信若不加以責成之法則在下多
不從是法至此窮矣一難也廠事初興米尚在二兩稍餘及今而
三兩之上彼助米一斗較前多三升矣特以德意殷殷勉思終事
且旣登印簿不免強輸其實吝惜之私奚啻剝肉若不更行變通
惟在責派殷富彼謂捐輸無已竊恐怨詈轉生是資至此窮矣二
難也各廠執事者初猶以奔走爲榮尙多擔任迨今兩月來烈日
乾坤正氣集

卷四十三

七

炎風往返勞役苟無實意寧免倦思甚則經理而被告訐司募而
受詈辱有此惡狀皆足灰心方且盼望及期勉告成事乃局方終
而復興力已疲而又策是執事之精力窮矣三難也兩邑五區總
理諸文學初則相地擇人繼而陪侍巡勸後乃往來稽核周環不
啻千里勞苦亦已五旬甚至館穀怨其曠時室家責被廢事且三
番費用除每區公給四兩此外所費又十餘金今復命其勸諭更
必有以支賠營私旣所屏絕寒素實爲不堪是總理之資費窮矣
四難也延粥之名非不美欲延之念非不慈然而審時度勢有此
四難敢遽以請於賢當事議者又謂事固難矣然雖加一日不愈
於己乎救得一人是一人延得一廠是一廠苟具此心必有所濟
數萬人將甦而復絕子不爲之再請於賢當事是數萬人卽子殺
之也治某怵然而懼乃與倪鴻老於廿四之未刻邀集各區諸總

理詳加酌議有可延之機者三謹以聞於左右目今溫米將至約略計之每石價止一兩三錢較之市價尙縮其半除抵還官帑尙應有數百石之餘量其多寡發助各廠官倡於先民自不得不隨於後是可延之機一也各區之中惟山陰西區會稽南區最屬貧瘠此外偶有富村尙義者或原派在八月之初或曾擬至七月之末以此數處似可觸類引伸因勢利導是可延之機二也五區總理諸文學雖皆心知其難而念切救民莫不願更竭其心力察彼神情鼓勵初無怠倦之思氣旣不衰於三鼓功或可成於一簣是可延之機三也有此三可延之機而更布之以上臺之教令奉之以諸生之鼓勵庶幾乎饑民可得食而救荒克底績乎然上臺之教令須有先聲焉更須有實惠焉所謂實惠者有三溫米之補助一也更求會計廳縣公祖父母有因粥以罰米者發給若干尙若

乾坤正氣集

卷四十三

八

干除留爲本廠之用又可以酌盈而濟虛二也五區諸生再出核勸雖極從儉省必每區二兩總計有二十兩之數亦乞於罰米之中取其餘者變價充用三也是此實惠之三所求老祖臺裁酌賜行者也所謂先聲者亦有三助米殷戶近方奔走辦糧倘得老祖臺鼎言邑父母於七月內特寬新徵一限緩急之間所感已多一也各廠中任事助米固當俟事竣之日行察獎賞今欲先示興起則宜速令總理開報擇勤勞最著捐助最多者耆民給與花紅台銜令自置扁文學儒童立案鈐印准作府考在一區不過數人便覺有鼓動之意二也諸總理之再出非奉憲示則家諭戶曉其誰聽之乞炤前給發大牌一面內稱會同刑尊加之勤倦勸諭之語中以緩徵普其惠獎賞欣其心官米之量助倡其德聽觀一新勸感必速三也是此先聲之三所求老祖臺斟酌賜行者也凡此皆

採集衆議非敢妄逞鄙臆會全余武老倪鴻老聞之道臺其中數事亦以爲有二三可從者謹此佈聞仰惟亮察臨啟不勝悚仄之至

致畢郡丞書

嚮者老公祖飭行保甲救寧地方不意尙有大盜高元夥其所劫彤山尼菴離敝村止一里之遙高元向爲舍姪家奴壞法逐出又犯事於吳期生舍親恨之入骨業行柳責而反逸出爲大盜蓋此輩俱在近村聚諸惡爲十條龍今所現獲之陶三王五王黑王九皆十條龍中人也據陶三稱高元所耽耽者在吳舍親王別駕與近村之潘張二姓以及寒家所掠既飽卽欲下海行劫此其志不在小幸小試於尼菴而敗亦天之厭其惡耳盜首狡黠異常一日不除則近村數十家尙不能安枕而臥萬乞老公祖多方指授

乾坤正氣集

卷四十三

九

必使盜首就擒雖餘犯或免脫一二亦不能爲大患矣乃陶三等方入獄而索詐四出其誣攀於當官者十之二三恐嚇於鄉里者十之七八陶三一日而通出索詐之書十三封凡鄉里中稍稍溫飽無不人人自危其已詐而用數十金者彤山之陳姓也用十數金者戴月等六七家現在恐嚇而思求免者張華之等數十家皆確確有姓名可查此際正當農作之時乃夢魂皆驚妻孥不保言至於此傷心慘日向曾與老公祖言盜夥之誣詐多皆牢頭獄卒所指使而此輩又有地棍在外爲之線索羽翼是以鄉民畏之如湯火在前無不俛首而飽其噉嚼者乞老公祖大張明示以安戢柯山西澤兩村之人百十家得以安生樂業皆拜明賜於世世也昨余武老所言馬鞍山大盜聞已有下海而劫赭山海寧者矣臨浦之陳華八陳華十三幾於揭竿弄兵幸擒撲之早具見老公祖

威靈遠暨但此夥錢可通神狂狴之中亦須嚴防之耳天樂鄉大盜楊三乃楊雄之弟已有銳器聚衆有四十餘人將來益恐猖獗聞出入在諸塢下莊兩處乞老祖臺留神以殛除之諸侯再布不宣

又

伏荷老公祖台臺軫念下土先事綢繆特垂台顧虛懷俯詢治某深切感服惟是以衰服在躬不敢握趨躬謝止於及門遙叩仰乞慈原連日恭承太公祖賜商於鄙劣不得不據臆披陳昨見儲米憲約知有成議敝鄉將來之凶荒可恃以無恐如天之造百世永戴矣惟是邇來盜賊日甚一日治某向對老祖臺言及河路之盜惟錢清至蕭山之五十里須逐程戒嚴而今自府城至錢清之五十里亦搶劫時間則治某深悔向日之失言矣向來止在歲暮今

乾坤正氣集

卷四十二

十

則見於初冬向來止在深夜今則見於薄暮以致船多中泊人有戒心至於自城東以達曹娥之一帶又不知安危若何也伏乞老祖臺垂神稽察或者每一兵船令之分管信地若干里行傳籌會哨之法俾徹夜巡邏嗣後遇有失事卽按其信地重加懲警庶盜賊其少戢乎所造之兵船倘不足以巡防則缺伍事故之兵餉不識可以申請支用否惟老祖臺台裁之昨晚承陳公祖垂訪言及前夜之盜劫已迫近於城廂矣卽城中如鎮東樓及九曲地方白晝禦人漸何可長近又聞駕舟要奪不但西陵之出途卽在鑑湖左右如秋湖帽山等處皆已見告此大都屬近村之無賴爲饑饉所迫而起若偏門染舖之劫聞有見其去路多係諸暨縣人者而錢清以下所在橫行則大都山陰西鄉蕭山接界之人如江塘批驗所魚鱗關等處也治某蒿目憂心所欲陳於老公祖者不過申

保甲勦窩家嚴捕役三事老公祖俱已早爲圖維矣昨見台示頒下各村人心已覺鼓動保甲之法前人犁然具備所望老祖臺擇簡易可行者嚴督必行城中不必言矣各鄉村或卽責成於縉紳大戶蓋彼自爲其身家較之細民更關切曷可不身先以倡率哉陳公祖云曾見夏彝仲之治長樂保甲一書行之有效不知可仿以爲式否至於盜賊之來雖無定址然必有窩主以作藏寄之藪大約窩主離被盜之家當不出二三十里之外否則一往一來天明跡露矣是以一家被劫數十里內誰爲不良窩圍奸宄在捕役之胸中必可揣摩而得然捕役正有不必得之念以自作其生涯此弊久爲老祖臺所洞悉按期嚴比自有台規或者求老祖臺盡呼兩邑之捕役俯諭以盜賊縱橫特加申飭又或炤其坐坊坐都分認地方各立結狀而獲有窩主渠魁立一賞格賞罰並行庶乎乾坤正氣集

卷四十三

激勸兼至充賞之貲不敢煩公帑或取之無主之贓或取之失盜之家至於城中以及四廂有營兵鄉兵可以聽老祖臺之驅使若城廂而分派有餘則鄉間要害如蕭山諸暨與山會接界之處每處量派一二十名用資防守亦可先聲奪人然營兵鄉兵一到地方極易騷擾似又必煩老祖臺之飭戢耳今年之荒歉爲從來所未有以荒致盜勢之必然故必防守偵索倍加戒嚴乃得奸徒屏迹然治某之所陳竇總無以加於老祖臺之高見桑梓寧謐實藉德威矣治某又有附啟者天不造越災禳頻仍今夏之霖雨不但低田泔爛卽在高原亦皆秀而不實十減三四敝鄉之縉紳大戶向來除糧米食米酌收米租之外餘皆盡收銀租今欲改而收米則收銀在一年之前已無可改矣就此收米之中高原亦當炤收以量減低田則顆粒無收將虛糧賠納矣就治某一家論之向來

計定之糧米食米今收未及半租戶已告匱竭况太公祖儲米頒令尤當首遵昨見湖州則折銀糴米以完漕都門則糴米折銀以給軍皆是通融之良法敝鄉軍糧例應上倉給散今不知可以少爲通融否治某伏思軍民一體倘肥民以瘠軍萬一致軍有言亦非所以平政體是以顯揭之明示治某亦不敢以此爲請者蓋恐老祖臺明開改折之門納戶又欲抑價以與軍軍必執詞以不願若聽納戶私與之折雖較之市價可以少減些須而亦必飽軍之欲而後已蓋軍之利折者以其寅食卯糧明年之需可得先供今冬之用故亦肯少減於市價而納戶則可以留此以爲積儲之米是實軍與民兩利俱存者雖不可執之爲成格而值此大歉之歲暫行一年於儲米救荒亦有裨焉治某不敢因一家之私致有礙於憲例惟據愚見若此乞老祖臺俯垂裁酌恃愛過隆忘其多喋

乾坤正氣集

卷四十三

十一

伏祈俯原可勝馳仄

致汪邑侯書

有啟者聞八甲九甲十甲現在帶徵而一甲之糧又已開徵矣當此匱乏之際上臺檄臨如雨兼以餉科將臨徵比必不能已士民寧不體老父母之苦心乎但舊欠帶比比在頑戶彼自無詞若新糧而五分之一外又復起花則必合縣里役奔走辦糧矣今粥廠開設雖任事不盡里役而里役亦在其中雖出米不盡里役而里役亦在其中若奔走辦糧必不能分身執事而且藉口吝嗇矣計本邑一百二十廠每廠約以飢民三百口計之便有三萬六千之民命所關其事不可爲不重大不知可少寬新徵在七月初十粥廠已撤之後否計爲時止於四十日或可曲賜俞允使三萬六千之飢民得終飽台惠而暫寬許時似於催科亦無大妨礙乎聞去年

六七分起花亦在七月今年之荒歉更甚故敢援例以請事關通
邑敢祈昭原若治生之糧則在二限之內皆已完及全額非有所
私老父母所素鑒也臨楮不盡馳仄

致陳臥子司李書

紹興府治山環水繞據一境形勝元微之夸樂天曰謫居猶得住
蓬萊樂天答曰大夸州宅似仙居東坡詩曰臥龍盤屈半東州少
游詩曰共躡丹梯上臥龍歷朝守土莫不加意保護禁民埋葬止
樵蘇以防郡龍之傷損培越州之秀靈近膺民社者漫不留意卽
如山之西麓爲古西園地本郡圃也亭臺寺院具載宋志中春秋
文大夫墓確在西園山上而爲居民亂塚所理沒前太守白公居
官清惠萬民留葬永福寺山新志炳載弟會訪其地而山已童而
墓亦在纍纍荒塚之內先生莅任後興廢舉墜明作有爲請首嚴
乾坤正氣集

卷四十三

三

府縣治後一帶官民山除已葬免遷外概不許開掘葬厝并樵採
樹木文大夫墓地白太守荒塚崇碑豎表此等事爲之甚易亦何
憚而不爲竊所不解

請石雨和尚住顯聖書

昔先大夫從令師湛和尚爲方外交者三十年受益良多今大師
具過師之智爲雲門法嗣而賤兄弟又得時時法座提耳命而不
啻父師之於子弟不知寒門有何薄緣得世受知識之教其爲慶
幸可勝言喻某匆匆王事碌碌塵勞翹渴有懷瞻就違願然每於
家兄讚歎之餘如親承大師道範儻得遂歸山之志當亟伸叩啟
之誠茲者雲門顯聖寺爲令師手創名席因方丈位虛宗風不振
合緇素輿情敢請大師住持向蜃樓中重施棟梁冰花上再加彩
畫毫端影現遍界輝光雖云夢中佛事亦爲覺苑勝緣

寄汪然明書

每念盈盈衣帶而睽違晤言動經隔歲豈山水妬人亦病冗相尋
自爲間濶耳年來小築如拳之山略效菟裘而洗石濬泉栽荷種
柳便覺僕僕多事然雖小致亦不可使山靈夢夢且辱遊覽諸賢
輒有篇什遂於一泚一楹之間少加題品謬輒爲寓山志成則當
持以求名筆作元宴敢預訂之

復侍御薦門生書

老年臺揭日孤標承天八柱侃論直聲振朝陽之鳴鳳蹇躬勁節
挾濟世之飛龍洵匡扶中興大業而踐台履揆先資也欣企欣仰
某夙懷山斗之瞻幸依輝於咫尺自揣雲泥之隔悵無地以攀緣
忽戴令捧至台翰開緘色躍戴令儼在門牆伯樂之顧皆驥公輸
之選必楨緣邀共事卽老年臺賜之掖持也緇衣同好敢忘鼎台
乾坤正氣集

卷四百三

西

使旋肅佈臨楮悚瞻

寄外舅商等軒先生書

前貴役至越詢知岳父新禧日茂福履躡臻小婿忝預戚末欣慰
可知近來雖兩遭骨肉之傷而尊太婆以高年康泰岳父以建牙
迎養天倫至樂眞爲罕覩令愛婦道克脩家慈而下盛稱令媛小
兒頗解言笑皆仰藉岳父如天之庇也前蒙尊賜遠頒長途稍得
充輿馬之用銘感無量矣小婿計偕擬於十月望間此時或可與
老叔公同行途中幸不寂寥家父以落窳鸞輿後當衝繁之地此
番入覲似或可免但不知以遷客之例而得早圖內轉否策末路
而再振全在岳父之提攜耳諸惟台鑒外有別稟不盡瞻戀彪佳
百拜具

左冲

以下二札俱墨蹟
藏會稽章燧家

又

再稟做座師錢素荷援引自謂受國士之知其所藉以爲二天之庇者久矣今外計在卽倏起浮議卽按臺亦云循良素著而特迫於都中下石之人夫以兩臺賢否明衡不能察四載官箴兩地政績乃寄於一新進館中之私忿可謂有清議乎且兩府四尊互爲推諉以釁端起於舊按臺時故不肯出一語挽回今按臺且以外轉行矣去取之權全在撫臺始終維持惟以岳父之片言爲重小婿一念犬馬之私固自不能已卽岳父爲地方保全一賢能官况素知其才品諒亦夙願然耳事在呼吸做座師如飢之望歲而溺之望援骨肉之感更當超於尋常萬倍矣外察科甲止用三人今如永嘉之張麗水之陳海鹽之夏烏程之曾俱在風波中推敲未有定議况撫臺旣明知造謗之人似益易解萬乞岳父專札求以委曲斡旋不特做座師仰賴赤手之援銘刻無極卽小婿得藉此

韋坤正氣集

卷四十五

五

以盡門牆之誼實同再造矣做座師云欲將片芹而以避嫌遂不得躬致衷悃幸邀主持圖報當有日也特此代懇伏惟留神尊札乞印以公文投遞尤爲愼密臨楮可勝懇切之至彪佳百叩再稟

左冲

又

小婿自奉違岳父台前拮据四月勞苦萬狀蓋此中之繁冗真是別一世界也宜事大槩已安以處豪奴開手以懲亂民結局先後之間稍有次第且暮具疏入告矣恭聞岳父起居佳勝不任欣慰因于忙萬冗久失候問一芹之獻望岳父鑒存張瀛海公郎言之邑令已得量免其役七叔公再致之遲之老得其回翰署篆可必也王蔣二佐貳小婿自當加意視之今已取之供事武闈稍示鼓舞孫倅已作古亦稍卹之矣朱青浦得入闈小婿曾致之撫臺轉

致然不敢貪天功也惟是所逋六千金壻再三催之終不可了奈
何小璿因過於勞劇七月間幾成怔忡今又時患心胃疼痛不知
稅駕何似也頃方入姑蘇交際與文移如蝟千萬欲吐竟不能稍
舒百一令愛常在府上否遊子遠離老母全得令愛孝養家慈可
謂竭力盡心以是稍得放懷耳走筆奉稟語多不倫俟岳父嶽降
之期再容揣中也臨啟瞻企不盡子壻彪佳百頓首

墨蹟藏山陰沈復榮家

與人書

都門謁選時得領年臺教益弟於歲杪始歸里子春受事莆中郡
城如斗而有萬難措手之處弟以拙才當之已抱償轅之虞而重
以署府署邑考試勾稽迄無寧晷遙企年臺琴堂鶴韻如天際眞
人邇聞榮調更翹首而望兩地棠陰也以年臺卓品鴻猷自當首
借銓垣况戊辰之行取大約在夏間則年臺著鞭益恢恢有餘地
乾坤正氣集

卷四頁十三

六

也若弟彪佳浮沉於最囂最瘠之郡將來不知若何稅駕耳令弟
年兄榮差歸越弟經年未通一介疎懶之罪非言可贖便中乞爲
弟致此歉仄之悃日與吳南羅共事一方其經濟所素裕者也至
於丰度沉悶如含光之劍弟之所欽服而深抱共事之慶者外不
腆一縷聊誌候私伏祈台鑒可勝瞻注弟彪佳再頓首 左慎下

四札俱墨蹟藏
蕭山蔡名衡家

又

別後遂已踰月山中臘梅盛開乃雲間佳種仁兄何日過我耶有
微同臺李子木年素慕王遂老妙畫從都門郵寄絹素欲求山水
數筆又有橫山草堂主人江邦玉求遂翁書松封二字且求落款
閒遂翁懶作筆墨之緣必求仁兄親詣強之乃可必得弟恐遂翁
裁答不敢作柬代求仰乞致意武林幽居以橫山爲第一邦玉今

日月亮也仁兄至武林不可不探橫山之勝交邦玉其人一畫一字必藉大力爲二君世珍弟彪佳再稽顙

又

清和之月貴園瑤華如繡惜以俗冗不獲與仁兄促膝御杯領略
香色徒令落英笑人寂寂也方無隅兄來得贈佳卉如許驚喜過
望而又惠及扇頭捧鴻老之畫不啻百朋重珍矣弟初度有隱痛
未曾受親友一物今不得不拜以誌雅誼感如之何田宅事有來
言及者弟對以弟不預聞道其實也而五家兄之貸銀致書則未
嘗謂無之及和州書到卽令投遞不知何故金姊丈去後踰旬日
舍姪始以原書返弟處已卽刻交與田宅此前日望後事想已入
陳公祖之目矣附此以復漢書一種近來閱之極快人意偶有副
本敬奉鄴架乞簡存爲禱弟彪佳再稽首

乾坤正氣集

卷四百五

七

又

前日得觀奇卉又擾郇饌感在五中齒謝爲溢墨晶章一枚質亦
佳弟嫌其鐫刻未精敬奉仁兄可改琢而用之牙骰一副附奉海
棠乞分少許有訂者弟欲作草花畫本託陳長耀每月一二至寶
齋圖畫現開之花每幅後卽書其開發之候種植之宜亦丹青中
一大快事也此兄解事知趣必不攀折其來時但勅園丁令入切
勿與一茶乃相安耳仁兄許之否諸俟晤悉彪佳頓首

又

仰惟老尊太品重南金名高東壁花封奏最乃昇方州聖天子縉
纓吏治首重外藩臨軒而問當有旌異以勸循良如不孝彪佳辱
預梓戚之末藉寵分光曷有紀極因憶向在長安或以渺未晉承
高明嗣是吏輻所束星合者忽爾菲分纔一披對元風尙未畧啓

鄙悃而過蒙老尊太注存遠及瓊函儼頒至於割如水之俸惠苦
塊之人則雅意尤倍恒情而感刻匪能言喻無地祇承轉深愧汗
惟尙有可鑄之肺腑當無不竭之唇吻順風而呼豈敢自外乃辱
台諭之後方敢片言則梓誼親誼之謂何竊自愧矣敝年伯陳心
翁才氣過人心力精密老尊太共事地方於簿書期會之外更有
一段傾心吐膽之意則諒無不乳水投而聲氣合者不孝區區弱
塵之附喬岳亦何足爲輕重哉薄將一片匪敢言報仰祈台慈賜
照彪佳臨楮可勝瞻注之至彪佳再稽顙

慎餘

墨蹟藏上虞
王壑霖家

乾坤正氣集

卷四十三

六

祁忠惠公遺集卷四

明祁彪佳著

涇縣潘錫恩校

劉祖澄行略

公諱鑿之字述鑑又字祖澄補邑弟子員性介直豁達多自負博涉羣籍工文辭有聲巽序間不獲雋生平事親婉友於兄弟父號原鑑不忘父字述鑑祖號澄源不忘祖字祖澄遵先志也念臺先生公同祖兄續修宗譜而贊及之凡係宗事不敢後篤於鄉鄰好施予施殮以樸施飯以粟時而贖人之妻賙人之乏不少吝伯嫂早寡撫其姪世覺俾有成立常存心小學著小學格言以仰承先生意先生喜公爲人常以手札相加簡箋甚多公取先生翰謹存之享齡四十有三郭有道病其不永然名重也

東山爾密復禪師瑤銘

乾坤正氣集

卷四十四

一

余觀古開創明王中興英主出而御世必有聖臣賢佐風虎雲龍固氣運使然亦因緣有會而法王之或開創或中興龍象駢臻傳持大道則亦有然者曹洞一宗開創於洞山其法嗣之盛固不必言繼之而中興者指不勝屈獨宋投子青禪師與我明雲門湛大師尤爲中興之英特蓋兩師皆於絕續之界傑然而起其力愈巨厥功愈偉以故投子之後得芙蓉楷諸名公爲宗門天柱而湛大師法嗣之盛亦古今合轍也湛大師道法盛極一時海內英緇奇衲無不求入室霑法乳而大師深得古人慎重之意於諸英奇中密驗精勘必擇其真可付受大法者方爲印可自道法大行後以至終席僅得七人焉如舜之五臣武之十亂爲數無幾而稱得人

之盛者必首推之東山爾密大師蓋其一也師諱明復字爾密別號散伊會稽王氏子生而雄偉力能仆牯賦性爽直齟齬中見鄰

里不平事輒奮身相助家貧未嘗讀書然日課金剛經不繇師訓似解其理二十一母見背益淡世味慕雲棲道風遂往師之明年謁貞白珊和尚於大慈決志力參殆忘寢食偶往德清探友舟中聞鑼聲豁然有省信口占偈曰鑼震空身世觀音獨露身泥牛銜月走木馬報新春時年己二十七猶羈俗也次年隨珊公入光明寺父兄以婚逼歸師外似無忤色而志己如石及期潛往開元僻處薙髮復入光明服勤於貞白者數載性相二宗咸領微旨珊示疾師竭誠左右願以身代珊示寂師躬壘塿以厚終事其篤於師資之誼類如此嗣謁名宿一金融公疇唱甚洽融曰子再來人也當遍參有道乃詣雲門參湛大師恍有宿契師呈聞鑼因緣湛曰汝夙有善根故得隨觀音入道命充維那臨事不苟有古人風一日湛翁上堂曰放下著師在座下全身脫落作偈曰夜半霜寒月

竝坤正氣集

卷四十五

二

忽低行人到此盡遲疑翻身踏著來時路點點星輝斗柄垂然韜祕之不以呈雲門也越二載雲門密驗師堪任大法命呈行腳師竟不呈侍者具足洩其偈雲門佳其幽元綿密付以偈曰鑼鳴與鼓響觀音塞耳門真得圓通意騎月上崑崙蓋天啟癸亥佛成道日也師以從上授受之重偕具足師入東山香雪塢韶光晦迹頗有大滄初住之風天啟丙寅雲門示寂天華席虛衆請師敷演楞嚴期畢以育王緣事抵金陵適博山和尚開法天界謁之山與論物不遷旨微辯竟日了無窒滯山云江南佛法洵自有人既而東山國慶寺延師爲中興第一代師芟草莽而居之耕耨工役師皆躬先勞極勿爲疲數年間規制大備而果熟香飄四方學徒憧憧至矣師終無意出世栽田博飯壞衣破衲儵然自樂每痛恨今之乞憐人世搖尾檀門者恥辱宗風玷汙名教而思以一身爲中流

之砥云自後八載聞聲光闇彰以講席禪期力請者無虛歲丙子冬余兄弟請開大法於梅壑彌陀古刹雲門瓣香從人天衆前拈出普薰法界道價遂重一時解制後卽會諸宏護請住雲門振湛師道法再三虔請而後允師入院卽闡華嚴繼湛師未了之志兩開法衆嘗五百餘己卯創方丈於院西庚辰爲師知命之年決意退休陞堂付授仍歸隱東山武林嚴忍公以徑山請司理黃海岸以雪竇請師皆不應余憫雲門法席久曠宗風寥落遂同沈求如先生及家仲季冒暑走懇師僅許重九詣寺一晤至期金湯畢集留之甚固師亦翻然不忍祖席廢墜遂俯順輿情緇素咸悅是冬弔瑞白和尚於弁山適示微疾及夏病篤然往來候問者必諄諄示誨無少倦廢食幾一旬而談笑不異平時猶作書贈物別諸法契臨終起坐書偈曰五臟作楚一疾結國手相逢盡告別世有不乾坤正氣集

卷四十四

三

藥之良方歇卽菩提誰肯歇吾今氣絕絕情緒也證一道甘露滅傷畢儼然而化實六月十六寅時也世壽五十二臘二十有四說法行道凡十五載語錄十卷行於世嗣法弟子十人匡教弟子二人師軀幹雄偉望之若泰山喬嶽然就之則和顏輒語坐人春風中生平簡率真直絕無緣飾不計親疎貴賤皆一目之乃各傾心誠服而去往往有得師片言頓改宿習者主持叢席威而不猛寬而有節每見有剗刻招提傷敗風教者必奮怒力排之不少假然胸無藏怒故人亦未嘗怨之也祕重大法不輕以隋珠彈雀至登座敷揚全力俱露而鞭龍撻象摧鋒破堅乃出之從容指顧間殆所謂於法自在者乎師於三藏元文率皆殫力探討相宗尤有深詣宗通說通師其庶幾哉先大參與湛大師以法爲友者三十年諸法嗣與余兄弟皆有道義骨肉之雅若敦世好者然余不能文

然知師頗深敢向虛空中描畫一上而加之以三毫云其諸弟子將於十二月廿二日藏師靈蛻於顯聖之南山爲之銘曰

石傘突岫白浪汨汨一飲以死一飲以活偉哉爾師挺塵越俗鑼聲一震鼻孔打失登珊之堂入融之室一到雲門片雪火焚嗣湛翁法續洞上宗雪塢韜光東山初唱梅里飛香元風大暢顯聖繼芳擾龍馴象法運頓躒法幢忽摧佛日西行寶鏡藏輝南山之陽湛翁藏蛻再藏爾師父子相萃慧炬常明曹源恒續

會稽雲門麥浪懷禪師塔銘

爰自二派之後五燈分燄獨盛於南繇唐宋迄今雖每興每替亦代不乏人至我明神廟時宗風寥落音響絕然唯吾越雲門湛然大師無待而作湛師會下爲龍象淵藪得法承記者衆而首授印記稱雲門長子者其麥浪懷禪師也師諱明懷字修湛別號麥浪

乾坤正氣集

卷四十四

四

山陰黃氏子母夢日月投懷而孕生四歲睹鄰人死亡卽喻死生之道十歲父故遂投天王寺寂然遐公出家辛丑參天台萬機禪師祝髮壬寅參雲棲蓮池大師受戒尋入耶溪雪浪紹覺明宗四法師席皆深契之自是精研性相洞達天賢然於宗門有所疑焉一日與禪者語躍然觸故遂往雲門參湛大師湛詰之曰聞汝在四法師處有江南江北第一之稱且道楞嚴云見猶離見見不能及如何是見不及處師答再三皆不肯乃求示參禪湛云但看取見不及處久之無下手處改參念佛是誰便見得力尋從翠林師坐禪天衣昏沉逼拶痛苦如貫矛戟一日覺身心世界與虛空相融一月內每每有得次年復從林公坐禪普濟逼至悶絕通身汗流爾時所得尤勝於前遂述偈曰拈却須彌大似針彌陀卒地入寒水今從拽斷泥牛鼻白日繇人打四更時從湛師至雲棲雲棲

以海底泥牛話驗湛師機緣師於言下知佛祖機用遂以偈呈雲
棲曰高峰黑豈未生芽今日拈來勸作家百億神通都潑徹無端
清眼著泥沙雲棲曰一點墨水兩處成龍後隨湛師還雲門問答
次湛師曰吾觀汝出言似有所入可一一呈似爲汝證明師呈似
畢曰從今去總不被古今老和尚舌頭瞞也湛師卽席拈起胡桃
曰我要用處不換機汝換作甚麼師打落於地湛師曰已爲我瞞
卻也師曰卻是和尚被瞞了也湛師曰簡點話頭看師曰胡桃只
是胡桃湛師合掌曰元沙三十年以此驗人並無一人道著汝見
處可謂拔萃矣後湛師開法壽聖師問如何是七事隨身湛擬答
師掩湛口曰休將閒學解埋沒祖師心湛師大怒厲罵不止師懷
疑辭去住古虞奉國山復住小蓬萊山一夕夢中忽聞響震天地
所詣境界較前尤異湛師招令分座雲門湛師應雙徑福城請卽
乾坤正氣集

卷四十四

五

命主法席復招至福城共訂涅槃疏一日與僧定林問答次湛師
曰麥浪若無後語猶是布袋老鴉機不離位墮在毒海師始豁壽
勝之機遂得應機無滯殆所謂欬唾掉臂皆西來意矣戊午湛師
集衆付師衣鉢偈曰如是之法宗說兼備汝今得之其善保庇六
度齊修惟勤惟細言與行符行與理契敲唱雙行小心敬畏出入
有規賞罰不昧公道治人親疎等視能如是行到如來地師是年
三十三也霄溪諸紳延住埭溪十方院己未武康二尹蕭延師開
法普濟寺庚申武康令周延師銅山寺辛酉蔡君建定慧菴延師
居之甲子徐君等延師住山陰明因寺鼎建聿新開法之日衆皆
仰爲元奘再世焉庚午彪弟兄請師重建梅墅古彌陀寺師盡出
衣資庀材囑無量師董之冬開法天衣寺十一月二十一日夜分
命茶跏趺榻上譚笑忽化去大衆號呼師復舉目巡視怡然而逝

年四十有五僧臘二十有九生於萬歷丙戌二月三日師省發於
天衣始示寂於天衣終師從湛大師最久湛師每開法輒命爲第
一座倚之若左右手湛師末年道法絕盛師首衆行正令因之開
瀾洞諸佛經文祖師公案皆成典證世稱天衣後身善光童子信
夫師資性穎靜心氣和融機用嚴密御事淳厚相好端舒言論雅
正令人情怡神朗宛然春風沂水中一時名公士紳緇素莫不投
誠而向慕之先大參嘗從湛大師遊知有是事今彪弟兄知有西
方聖人之道而季兄且得承宗門事皆師引導之力師示寂時季
兄夢至天衣握師再起問曰阿羅漢不受後有乎雲門三爲國王
乎師曰皆非也願爲清僧度世耳乃期彌陀七日而化及季兄歸
而靈蛻已移於彌陀寺矣對龕瞻禮宛如夢中亦適符七日之期

乾坤正氣集

卷四十五

六

焉遂施地起塔供於寓山之陽噫彪兄弟與師夙緣交契可槩見
矣師所著稿多不留存唯語錄二卷行於世師開法普濟時有白
衣余姓者請法袒襟向佛以刀自剖其腹出心及臟合掌高聲曰
感佛宏恩剖心作供耳鑿人與之還內腹中數日如故師與剃染
爲僧名淨心字叵思次隨定慧見鄰人病篤乃剖肉與救之及隨
天衣聞虎坐山門祝曰勿傷人吾當飼汝次日乃直抵其穴以飼
之夫師輒開法而叵思每應之其有感於藥王燃身之事耶抑同
類唱和醒人於沈酣醉夢之閒耶吾不敢以凡情度之謹附其事
若此嘻彪於道無所證入不能向筆尖上點出金剛正眼但與大
師相友有年故直述其概云爾門人無跡以銘屬彪彪不敏不敢
辭銘曰

古越雲門洞宗再新獅子滴乳寶鏡蓮輪神廟在御裁輔儀民雙

眼圓嗣唯師正真與奪自在機鋒莫倫胡桃縱奪白紙回文千七百語三藏微言拈來證據江海瀾奔扶微極奧衆極契神權開五位善攝三根大哉雲門左手右手開悟衆賢菩提同偶淵淵百川浩浩天首寶月何方澄潭印有鐵面慚惶塔巖銘守靈蛻深藏香林不朽

祭錢麟武相國文

維崇禎十四年二月乙卯祁彪佳恭奠於武英殿大學士麟翁錢老先生之靈曰吾越之大拜也有宋稱杜祁公逮昭代及公凡宣麻者六其著於先則謝文正之正呂文安之安朱文懿之懿皆立朝久公視三公德業品望可兼乃立朝久則未也攻杜祁公以慶歷四年同平章事務裁僥倖封還內降次年遂與范富同罷爲相僅一百二十日歸休鑑湖於至和二年卒蓋五載閒居之樂也公

乾坤正氣集

卷四百十五

七

以名儒宿學師錫秩宗今上龍飛之三載登庸當邊警狂逞之際公調度指畫悉中機宜廟堂倚之爲重乃以偶不合於時揆席未暖遽予歸出處恰符杜公惟自辛未迄庚辰閒居之樂較倍之嗚呼公之功業卽未竟而品望道卓不旣歸然歎今夫慶雲之現絳香威鳳之集丹闕與夫金鏞寶瑟之振清廟明堂也以占卜祥熙鼓舞瑞盛原不俟久於聽瞻公之爰立忠誠端謹足以格主介潔剛方足以持世和平虛公足以商定大事解散小羣一日立朝一日足以福禔薄海安攘裔夷其諸慶雲威鳳金鏞寶瑟也乎而一曲旣請卜築小隱之陽睇蘭渚漱鸞池蜻蛚小艇朝出夕還知者忘其爲山中宰相不知者則直以爲蕭然隱翁皤然逸老而公十年來優游林泉正不必與洛陽名園甲勝有官居鼎鼐無地起樓臺二語若爲公設矣公素抱忠盡不以江湖忘魏闕海內望公之

手采咸以出處卜安危主上追思耆碩方且再展經綸開一代平
明之治而道山遽逝是何世道之重不幸也然自公歸而玉鉉黃
耳之吉不勝折足覆餗之凶多矣君難則臣不易公以一退完身
名履壽康偶爾示疾言返泰清應昂而生騎箕而去如今固未一
二見者也彪佳先嚴後公成進士叨氣誼最篤小子愚昧公時時
進而教之高山景行切之寤寐更以世誼許依葭李其於承風下
請之私蓋尤未艾公之登遐山頽梁萎舉世共惜况在彪佳其可
槩同於尋常之誄公者耶論次上台炳今映古微公而誰介以剖
牲翦韭維公駐僊輶爲鑒諸嗚呼尙饗

乾坤正氣集

卷四十四

八

09972

